

Sr. Antoni Gario di SNAP

Pa prome biaha lo introduci San Nicolas Day y ta conta riba sosten di henter comunidad

Un fecha pa recorda e importancia di San Nicolas den economia di Aruba

ORANJESTAD - E organisacion cu ta traha na promociona e bario di San Nicolas, esta SNAP, San Nicolas Awareness Project, a cuminsa cu un proyecto cu nan kier bay duna tur atencion na dje, cu ta titula “San Nicolas day” esaki no tin nada di haber cu e festividad di Sinterklaas, pero mas bien tin di haber cu e rol importante cu San Nicolas a hunga durante añanan na Aruba y e desaroyo di pais Aruba, cu practicamente a cuminsa na San Nicolas mas cu 80 aña pasa.

Ayera tabata net 82 aña pasa cu Aruba a conoce inicio di progreso economico. Riba 17 di november oficialmente a inaugura e haf di San Nicolas. Inauguracion di e haf tawata e inicio di otro actividad di construccion. Por ehempel via di e manera aki a yega Aruba hopi material di construccion pa e refineria. Pa e motibo aki lo celebra e dia di San Nicolas tur aña den luna di November, teniendo

na cuenta e fecha di 17 di november. Si e fecha ta cay riba un dia den siman, lo celebra e dia di San Nicolas riba e diadomingo despues di e fecha, pa asina duna tur hende oportunidad pa bin celebra e dia aki na San Nicolas.

E organisacion ta haya masha importante pa duna un empuhe mas y reconoce realmente kico San Nicolas a nifica pa e desaroyo economico di e pais. Hunto cu e San Nicolas Day aki tambe lo duna reconocimiento tambe nan algun persona cu ta traha duro pa nan bario of ta personanan cu ta destaca na Aruba, pero saliendo for di e bario di San Nicolas.

Pa e proyecto aki cu e aña aki ta tuma luga pa prome biaha, Sr. Antoni Gario hunto cu henter e comision, a traha riba un competencia di logo. Tur scol rond di Aruba a wordo acerca pa duna tur mucha e oportunidad pa participa na e actividad aki. A haya masha hopi concepto di logo cu lo bay bira e logo cu mester identifica e proyecto aki, pero



mas importante San Nicolas. Den futuro kier crea un museo unda por ilustra tambe tur e actividadnan economico y tur loke a contribui na desaroya e area pariba di brug y cuanto cos a cambia a lo largo di e añanan.

E prome biaha cu esaki ta keda organisa ta riba e fecha di dia 29 di november, lo tin un agenda amplio unda cu diferente bandanan lo presenta. E programa ta cuminsa for di 8:30 di mainta cu bishita na e

cas di grandinan, despues pa 9:45 lo tin un misa special na e respectivo iglesianan, 11:00 lo tin un bake sale na e terminal di bus, 1:30 pm lo tin e preparacion pa e parada na YMCA. Despues pa 4:30 e ceremonia oficial di apertura cu presencia di e diferente representantenan honorario di San Nicolas y pa 6:00 di atardi un amplio presentacion pa gruponan di tur parti di e isla.

Mester wak e Dia di San Nicolas aki manera un Dia di

Rincon na Bonaire, unda cu e bario ta haya su reconocimiento pa su importancia y rol cu e ta hunga den e comunidad aki. San Nicolas tabata e area cu a impulsa economia di pais Aruba y cu pa añanan largo tur cu a bin traha na Aruba a baha na San Nicolas y a cuminsa ehersce nan profesion, despues a bay tur otro caminda. Pesey ta importante pa e organisacion cu tur hende rond Aruba, bini hunto y celebra cu otro e dia importante aki dia 29 di november.